

四庫全書

史部

欽定四庫全書

欽定續通志卷四百九十八

列傳

元 五十二

奈曼台

多爾濟

多爾濟巴勒

阿魯圖

努都爾噶

伯勒濟爾布哈

太平

特穆爾達寶

達寶特穆爾

奈曼台穆呼哩五世孫曾祖博囉祖阿爾濟蘇追封

王謚忠惠父和斯和哩嗣國王追封薊王奈曼台摯靜
有威大德五年奉命征海都都勒幹以功授宣徽院使
七年拜領北行省右丞舊制募民糧以餉邊是歲用事
者殺其數民進退失措奈曼台請于朝悲受所輸為下
年之數民感其德至治二年改甘肅行省平章政事甘
肅歲糴糧于蘭州輓運隔二千餘里奈曼台改從提近
歲省費六十萬緡天厯二年遷陝西行省平章政事關
中大饑詔募民入粟予爵四方富民應命輸粟積闕下

初河南饑告糴關中民過其糴至是關吏乃河南人修宿怨拒粟使不得入奈曼台杖關吏而入其粟京兆民掠人而食則命健卒分捕其患乃已時入關粟雖多而貧民乏鈔以糴乃取官庫未燬昏鈔給民用俟官給賑饑鈔如數易之先時民或就食他所多毀墻屋以往奈曼台諭使勿毀明年還皆得安堵如初拜西行臺御史大夫命送大宗皇帝舊鑄皇兄之寶於其後嗣揚珠濟達奈曼台威望素嚴至其境禮貌益尊至順元年遷上

都留守進知嶺北行樞密院事封宣寧郡王尋奉命出

鎮北邊錫予尤重後至元三年

多爾濟傳作後至元四年事

詔襲國

王六年拜嶺北行省左丞相至正二年遷遼陽行省左

丞相以年踰六十上疏辭職歸八年卒于家追封魯王

謚忠穆子二長額森布哈中書右丞次鴻和爾布哈

多爾濟穆呼哩六世孫托克托子也多爾濟生一歲而

孤稍長備宿衛事母至孝喜讀書於古君臣行事忠君

愛民之道多所究心至治二年授集賢學士時年未及

冠一時耆宿皆器重之天厯元年多羅台國王自上都
領兵至古北口與大都兵迎敵文宗殺之二年以多爾
濟襲國王位順帝至元四年多羅台弟奈曼台恃太師
已延勢謂國王位乃其所當襲愬于朝已延妻欲得多
爾濟大珠環多爾濟無以應則慨然曰王位我祖宗所
傳不宜從人求買我縱不得為亦我宗族人耳於是奈
曼台以賂得為國王而除多爾濟遼陽行省左丞相六
年遷河南行省左丞相先是河南范孟為亂連繫者千

百計多爾濟知其寃欲直之而平章政事納琳執不從
已而納琳還言於朝以為多爾濟心徇漢人多爾濟亦
不卹也至正四年遷江浙行省左丞時杭城荐經災燬
伯勒齊爾布哈先為相庶務寬舒多爾濟咸承其舊民
心翕然汀州寇竊發遣將士招捕之威信所及數月即
平居二年方面晏然杭民請建生祠如前丞相故事多
爾濟辭弗許七年召拜御史大夫拜中書左丞相升右
丞相監修國史而太平為左丞相時朝廷無事稽古禮

文之事有隆必舉請賜經筵講官坐以崇聖學選清望
官專典陳言以求治道覈守令汰僧尼舉隱逸一時稱
盛九年罷丞相位復國王之國遼陽十四年詔托克托
總兵南討中書參議龔伯璵建言宜分遣宗王及異姓
王俱出軍吳王托爾濟厚賂伯璵獲免多爾濟曰吾國
家世臣天下有事此正効力之秋也即領兵出淮南聽
托克托節制托克托遣使攻六合拔之既而詔削托克
托官爵罷其兵權多爾濟乃以本部兵守揚州十五年

卒于軍多爾濟為相務存大體而一時政權頗出於太平趨附者衆多爾濟處之凝然不與較然太平亦能推讓盡禮中外皆號為賢相云二子都哩木特穆爾翰林學士納木喀實哩襲國王

多爾濟巴勒字惟中穆呼哩七世孫

宗穆呼哩傳穆呼哩次子蘇肯徹爾生

納顏納顏生碩迪為多爾濟巴勒之祖則是五世孫也本傳誤

祖碩迪父伯勒格特穆

爾多爾濟巴勒甫晬而孤育於從祖母拜珠從父也請

仁宗降璽書護其家稍長好讀書年十四見文宗適將

幸上都親閱御衣命錄于簿左右無能書漢字者多爾濟巴勒引筆書之文宗喜曰世臣之家乃能知學豈易得哉命為尚衣奉御尋授工部郎中元統元年擢監察御史首上疏請親祀宗廟赦命不宜數又陳時政五事時日月薄蝕烈風暴作河北山東旱蝗為災乃復條陳九事上之先是教坊官位在百官後御史大夫薩題傳旨俾入正班多爾濟巴勒執不可又西僧為佛事內廷醉酒失火多爾濟巴勒劾其不守戒律延燒宮殿薩題

傳旨免其罪多爾濟巴勒又執不可一日間傳旨者八
乃已丞相巴延御史大夫騰吉斯二家家奴怙勢為民
害多爾濟巴勒捕致于法民大悅騰吉斯怒多爾濟巴
勒曰我知奉法而已他不知也騰吉斯從子茂穆蘇為
欽察親軍指揮使恣橫不法多爾濟巴勒劾奏之茂穆
蘇集無賴子欲加害會騰吉斯被誅乃罷累遷侍書學
士同知經筵事是時年甫弱冠又世家子乃獨以經術
侍帝左右世以為盛事至正元年除翰林學士仍知經

筵事時喀喇庫庫以翰林學士承旨亦在經筵敷陳經義多爾濟巴勒為之翻譯曲盡其意多所啟沃俄遷大宗正府伊克托爾吉齊聽政之際引諭律令曲當事情宗王有殺其大母者多爾濟巴勒必欲正其罪時相難之出為淮東廉訪使遷江南行臺治書侍御史未行又遷江西行省左丞以疾不赴北還養疾黃厓山中起為資正院使五年拜中書參知政事同知經筵事時有以善音樂得幸者有旨用為崇文監臣多爾濟巴勒曰用

倖人居清選臣恐後世議陛下帝悅升右丞尋拜御史中丞監察御史劾奏伯勒齊爾布哈章甫上黜御史大夫琳沁巴勒為江浙行省平章政事

伯勒齊爾布哈傳作江浙左丞相

多爾濟巴勒曰若此則臺綱安在乃再上章劾奏并留大夫不允臺臣皆上印綬辭職帝諭多爾濟巴勒曰汝其毋辭對曰憲綱隳矣臣安得獨留帝為之出涕多爾濟巴勒即杜門謝賓客尋出為遼陽行省平章政事至官詢民所苦知貴室僮奴公府隸卒強買民物僅酬半

直又其俗編柳為斗大小不一賈僧得以高下其手民
咸病之即飭有司厲防禁齊稱量諸物乃畢集而價自
平又存恤孤老平準錢法清銓選汰胥吏慎勾稽興廢
墜鉅典畢舉苟有罪雖勲舊不貸王即有司聞風悚懼
召為太常禮儀院使會盜起河南帝憂之拜中書平章
政事首言治國之道綱常為重前西臺御史張桓仗節
死義不污於寇宜旌之以勸來者又言宜守荆襄湖廣
以絕後患又數論祖宗之用兵非專於殺人蓋必有其

道焉其言頗忤丞相托克托意時托克托倚信左司郎中汝中柏員外郎拜特穆爾兩人因擅權用事而多爾濟巴勒正色立朝無所附麗適陝州危急因出為陝西行臺御史大夫至中途聞商州陷即輕騎兼程至奉元而賊已至鴻門即就署尋命與行省平章托多便宜同討賊遂督諸軍復商州乃修築奉元城募民為兵出庫所藏銀為大錢射中的者賞之由是人皆為精兵金商義兵甚精銳列其功以聞賜敕褒獎由是國家獲其用

時御史大夫額森特穆爾師敗于河南西臺御史蒙果
勒哈雅范文等共劾奏之多爾濟巴勒當署字顧左右
曰吾其為平章湖廣矣未幾命下果然額森特穆爾托
克托之弟章既上托克托怒故左遷多爾濟巴勒而御
史十二人皆見黜關中人遮道泣留多爾濟巴勒慰遣
之不聽乃從間道出至重慶聞江陵陷或以道梗請少
留不從既至律諸軍以法而授納粟者以官人心翕然
汝中柏拜特穆爾言於丞相曰不殺多爾濟巴勒則丞

相終不安乃命專給軍食時官廩所儲無幾即延州民有粟者諭勸貸粟民無不從又遣官糴粟河南四川之境民聞其名爭輸粟以助餉右丞巴延布哈方總兵承順風旨數侵辱之多爾濟巴勒不為動會官軍復武昌至蘄黃巴延布哈百計徵粟無不給之猶欲言其供需失期達爾罕軍帥王布哈奮言曰平章國之貴臣今坐不重茵食無珍味百需立辦猶欲誣之是無人心也托克托遣國子助教諤勒哲至軍風使害之諤勒哲至則

反加敬禮語人曰平章勲舊之家國之祥瑞吾苟傷之
則人將不食吾餘矣多爾濟巴勒素有風疾軍中感霧
露所患日劇遂卒于黃州多爾濟巴勒以扶持名教為
已任薦拔人才留心經術凡伊洛諸儒之書未嘗去手
喜為五言詩於字畫尤精其在經筵開陳大義間采前
賢遺言次為書四卷一曰學本二曰君道三曰臣職四
曰國政明道厚倫制行稽古游藝五者學本之目也敬
天愛民知人納諫治內五者君道之目也宰輔臺察守

令將帥摯御五者臣職之目也興學訓農理財審刑議
兵五者國政之目也帝覽而善之賜名治原通訓藏于
宣文閣二子特古斯特穆爾都沁特穆爾

阿魯圖博爾濟四世孫父穆呼哩阿魯圖由經正監襲
職為集賽官掌環衛遂拜翰林學士承旨遷知樞密院
事至元三年襲封廣平王至正四年托克托辭相以阿
圖魯薦詔拜中書右丞相監修國史而伯勒齊爾布哈
為左丞相從駕行幸每同事出入一時以二相協和為

喜時詔修遼金宋三史阿嚕圖為總裁五年三史成以其書進帝曰朕與卿等皆當取前代善惡為勉阿嚕圖頓首舞蹈而出一日與僚佐議除刑部尚書宰執有所舉或以其人柔軟阿嚕圖曰廟堂選劄子耶不枉人不壞法即是好刑官何必求強壯人左右無以答其知大體類如此先是伯勒齊爾布哈當與謀擠害托克托阿嚕圖不從六年伯勒齊爾布哈乃諷監察御史劾奏阿嚕圖不宜居相位阿嚕圖即避出城其姻黨皆為不平

請曰丞相何不見帝自陳阿魯圖曰我豈以丞相為難
得耶但帝命我不敢辭今御史劾我我宜即去爾等無
復言阿魯圖既罷去明年伯勒齊爾布哈遂為右丞相
不久亦去十一年阿魯圖復起為太傅三公表作太保出守和
琳邊卒

努都爾噶博爾濟四世孫也早歲備宿衛累遷同知樞
密院使既而廢處于家順帝至元五年奉使宣撫達勒
達之地整理有司不法事三十餘條由是朝廷知其才

升知嶺北行樞密院事至正十五年召拜中書平章政事遷知樞密院事十七年以太尉總山東諸軍守鎮東昌路擊退田豐兵十八年田豐復陷濟寧進逼東昌努都爾噶以乏糧棄城退屯柏鄉東昌遂陷還京師拜中書添設左丞相與太平同居相位努都爾噶有識量處事平允浙西張士誠既降努都爾噶處置江南諸事咸得其宜士誠大服興和路富民調戲子婦繫獄行賂刑官久不決努都爾噶除刑部侍郎為興和路達魯噶齊

俾決其事富民遂自縊凡授官惟材是選不用私人衆稱其有大臣體已而遽罷相遷知樞密院事嘗臥病謂所知曰太平真宰相才也我疾固不起而太平亦不能久於位此可歎也朝官至門候疾者皆謝遣之二十年卒

伯勒齊爾布哈字大用楊珠濟達氏曾祖穆齊特以千戶從憲宗南征有功父阿固台事成宗為丞相被誅後贈和寧忠獻王伯勒齊爾布哈蚤孤八歲以興聖太后

及武宗命侍明宗于藩邸尋入國子學為諸生會明宗以周王出鎮雲南伯勒齊爾布哈從行至大同而還仁宗召入宿衛英宗朝命襲八番宣撫使達嚕噶齊宣布恩信峒民感悅有累歲不服者至是皆受約束泰定三年特授同知太常禮儀院事益從耆老文學之士雍容議論尋拜監察御史累遷吏部尚書至順元年出為廣西兩江道宣慰使司都元帥尋除禮部尚書擢侍御史特命領宿衛凡宿衛士有從掌領官薦用者往往舉其

親暱獨伯勒齊爾布哈推擇歲久者舉之衆論翕服至
元四年拜御史大夫知經筵事尋遷中書平章至正二
年拜江浙行省左丞相行至淮東聞杭城大火燒官廨
民廬幾盡即疾馳赴鎮下令錄被災者二萬三千餘戶
戶給鈔一錠焚死者亦如之人給月米二斗幼穉給其
半又請減鹽課酒課等稅朝廷皆從之在鎮二年召還
除翰林學士承旨仍掌宿衛四年

宰相表作至正三年十二月

拜中

書左丞相奉使周行沙漠洗冤除弊不可勝計又奏發

使諭諸王使各撫其民毋踰法制於是內外震肅明年
歲大饑流民載道令有司賑之欲還鄉者給路糧又錄
在京貧民日糴以糧七年進右丞相明年御史劾奏伯
勒齊爾布哈而徽政院使高龍卜在帝側為解帝遂不
允乃出御史大夫琳沁巴勒為江浙左丞相按琳沁巴
勒傳云出
為江浙行省平章政事遷拜湖廣行
省左丞相本傳蓋誤合為一官也 中丞以下皆辭職
詔復加太保於是兩臺各道言章交至伯勒齊爾布哈
益不自安尋謫居渤海縣十年卒後子達實特穆爾用

于朝遂贈太師追封冀王謚忠宣達實特穆爾字原理仕至中書平章政事有學識能世其家

太平字允中初名惟一後賜姓蒙古氏名太平勝以非罪死太平年尚幼泰定帝雪其父冤而撫恤之太平資性開朗嘗受業于趙孟頫又師事雲中呂弼始襲父職為虎賁親軍都指揮使尋擢陝西漢中道廉訪副使文宗召為工部侍郎又除上都留守同知順帝元統初命為樞密副使尋升同知樞密院事遷御史中丞時中書

有參議佛家律者儉人也御史劾其罪時宰庇之事寢不行太平辭疾家居至正二十年詔起為中書參知政事辭進右丞又辭會御史祁君璧復劾佛家律黜之乃起就職遼金宋三史久未克修至是太平為總裁官力贊成之四年升中書平章政事六年拜御史大夫

按宰相表至正五年

十月太平由平章政事拜御史大夫此作六年互異

故事臺端非國姓不以授太

平固辭詔特賜姓而改今名七年遷中書平章政事班同列上國王多爾濟為左丞相請于帝願得太平與共

事乃拜太平左丞相而以多爾濟為右丞相明年詔修
后妃功臣傳特命太平同監修國史時天下無事凡朝
廷稽古右文之典有墜必舉平生好訪問人才不問南
北必記錄于冊至是多進用之初托克托既罷相出居
西土會其父滿濟勒噶台卒太平請令托克托歸葬以
全孝道左右以為難太平為之固請托克托乃得還既
而還朝拜太傅然不知太平之有德于已也因汝中柏
讒間成隙欲中傷之是時中書參政孔思立等皆一時

名人太平所拔用者悉誣以罪黜去九年罷翰林學士
承旨既又誣劾其過失而并論其子額森呼圖克不宜
僭娶宗室女托克托母聞之謂托克托兄弟曰太平好
人也何害於汝而欲去之侍御史寶默圖揚言于朝曰
御史欲害人壞臺綱如天下後世何故吏田復勸太平
自裁太平曰吾無罪當聽于天遂還奉元杜門謝客會
河南盜起十五年詔為江浙行省左丞相未行改淮南
行省左丞相兼知行樞密院事總制諸軍駐于濟寧時

諸軍久出糧餉苦不繼太平命有司給牛具以種麥自
濟寧達于海州民不擾而兵賴以濟議立土兵元帥府
輪番耕戰十六年移鎮益都未幾除遼陽行省左丞相
十七年召為中書左丞相時毛貴據山東明年由河間
入寇官軍屢敗漸逼京都廷議遷都以避之太平力爭
以為不可起用同知樞密院事劉哈喇布哈于彰德擊
敗賊衆京城遂安會張士誠以浙西降晉冀關陝間察
罕特穆爾屢以捷奏於是中外翕然有中興之望時右

丞相綽斯戩家人以造偽鈔事覺刑部欲連逮綽斯戩
太平力為解之二皇后奇氏與皇太子謀為內禪遣宦
者資政使保布哈諭意太平皇后又親召至宮舉酒申
前意太平依違而已是時皇太子欲盡逐帝近臣又令
監察御史劾帝親暱御史中丞圖魯特穆爾未及奏而
所劾御史遷為他官皇太子疑額森呼圖克泄其事益
決意去太平政柄知樞密院事努都爾噶數於帝前左
右之以故皇太子之志未及逞會努都爾噶死皇太子

遂令監察御史邁珠僧格實哩劾左丞成遵參政趙中等下獄死以二人為太平黨也太平知勢不可留數以疾辭位二十年拜太保俾養疾于家會陽翟王阿勒呼木特穆爾倡亂騷動北邊勢逼上都皇太子言于帝命太平留守上都實欲置之死地太平遂往有同知太常院事托歡者額森呼圖克故將也聞楊翟王將至乃引兵縛王至軍前太平不受令生致闕下北邊以寧未幾詔拜太傅賜田若干頃俾歸奉元帝欲以巴咱爾為丞

相巴咱爾辭曰臣老不足以任宰相必以命臣非得太平同事不可於是密旨令巴咱爾留太平毋行太平至沙井聞命而止皇太子惡其既去而復留也二十三年令御史大夫布哈

順帝紀作監察御史敏珠爾哈雅

劾太平故違上命

當正其罪乃詔悉拘所授宣命及賜物俾往陝西之西居烏綽斯戢因誣奏之安置土蕃尋遣使逼令自裁太平至東勝賦詩一首乃自殺二十七年監察御史辨其非辜請加褒贈子額森呼圖克名均字公秉少好學有

俊才累遷殿中侍御史翰林侍讀學士皆兼襲虎賁親軍都指揮使太平為相務廣延才彥而額森呼圖克又傾已下士以故名稱藉然已而被劾罷從親還奉元居六年召為兵部尚書同知樞密院事遷太子詹事十九年羣盜屯遼陽除通政院使太平再相授樞密院事詔額森呼圖克率師往討拔懿州盜踰遼河東奔而朝廷讒搆日甚罷為上都留守尋改宣政院使以丁內艱不起綽斯戢再相復強起之即日監察御史額森特穆爾

李好直又劾罷之已而縛斯戩徇皇太子旨構成獄誣魯達實曼濟阿南達實哩沙嘉實哩額森呼圖克及托歡等不軌煅鍊其獄魯達實逃于大同軍中曼濟阿南達實哩等皆貶死額森呼圖克當貶薩斯嘉之地道由圖沙瑪宣政院使呼濟哩素受知太平因留居其地執政知其故奏額森呼圖克違命杖死之有詩集十卷

特穆爾達實字九齡國王托克托之子事明宗於潛邸文宗初由同知都護府事累遷同知樞密院事後至元

六年拜中書右丞至正改元升平章政事已延罷相庶務多所更張特穆爾達實盡心輔贊每入直帝賜坐榻前詢以政道二年郊建言大祀竣事必有實惠及民乃賜民明年田租之半嶺北地寒不任穡事歲募富民和糴為邊餉至是乃請別輸京倉米百萬斛儲于和琳以為備日本商百餘人遇風漂入高麗高麗掠其貨表請沒入其人以為奴特穆爾達實曰天子一視同仁豈宜乘人之險以為利宜還其貲已而日本果上表稱謝五

年拜御史大夫務以靜重持大體建言近歲大臣獲罪重者族滅輕者籍其妻孥祖宗聖訓父子罪不相及請除之著為令近畿飢民爭赴京城奏出贖罰鈔糴米萬石食之所活不可勝計居歲餘遷平章政事位居第一大駕時巡留鎮大都七年首相去位帝命為左丞相修飭綱紀立內外通調之法朝官外補許得陞辭親授帝訓郡邑賢能吏次第甄授入補朝闕分海漕米四十萬石置沿河諸倉以備凶荒孔子後襲封衍聖公階止四

品奏升為三品歲一再詣國學進諸生獎勵之中書故事用老臣預議大政久廢不設特穆爾達實奏復其規起達罕張元朴等四人為議事平章從幸上京還入政事堂俄感暴疾卒追封冀寧王謚文忠特穆爾達實天性忠亮伊洛諸儒之書深所研究帝嘗稱王文統奇才對曰世祖有堯舜之資文統不以王道告君而乃尚霸術何足取乎初巴延議罷科舉特穆爾達實時在參議府不署牘及入中書乃議復之徵用處士待以不次之

擢或疑為太優特穆爾達實曰隱士無求于朝廷朝廷有求于隱士區區名爵奚足惜哉時修遼金宋三史特穆爾達實為總裁官多所協贊云

達實特穆爾字九成幼與其兄特穆爾達實俱入國學為諸生以世胄補官為太府監提點擢治書侍御史以言罷除樞密院同知累遷為湖廣行省平章政事沅靖柳桂等路徭獠竊發朝廷下詔招諭之達實特穆爾謂寇情不可料請置三分省一治靜江一治沅靖一治柳

桂分兵益戍朝廷如其言已而諸徭獠悉降召還復為
大司農至正十一年台州方國珍起海上達實特穆爾
奉詔與江浙行省參知政事樊執敬往招諭之明年盜
起河南拜河南行省平章政事至則修城池飭備禦賊
不敢犯其境遷淮南行省平章政事十五年入為中書
平章政事時中書庶務多為吏胥遲留至則責委提控
掾史二人分督左右曹悉為剖決出為江浙行省左丞
相尋兼知行樞密院事許以便宜行事

按順帝紀達實
特穆爾兼知行

樞密院事在時江淮盜勢日盛南北阻隔達實特穆爾
至正十六年

獨治方面而任用非人肆通賄賂賣官鬻爵於是謗議
紛然所部郡縣往往淪陷十六年張士誠陷平江進逼
杭州達實特穆爾即棄城遁萬戶普賢努力拒之而苗
軍帥楊諤勒哲亦引兵至敗走張士誠達實特穆爾乃
還初達實特穆爾以諤勒哲為海北宣慰使都元帥尋
升江浙行省參政至是遂升右丞而苗軍素無紀律肆
為鈔掠所過蕩然無遺達實特穆爾方依諤勒哲以為

重莫敢禁遏故諤勒哲愈矜驕自肆不可復制明年士誠寇嘉興屢為諤勒哲所敗乃遣曼濟哈雅以書詐降而書詞多不遜諤勒哲欲納之達實特穆爾謂其反覆不可信諤勒哲固勸乃許之遂授士誠太尉其弟士德淮南行省平章政事士信同知行樞密院事其黨皆授官有差士德尋為明兵所擒復升士信淮南行省平章政事然士誠雖降而城池甲兵府庫錢穀皆自據如故於是朝廷以招安張士誠為達實特穆爾功詔加大尉

按順帝紀達實特穆爾加太尉在
至正二年事與本傳紀年互異
是時徽州建德皆已

陷諤勒哲屢出師不利士誠素欲圖諤勒哲而諤勒哲
時又強取平章政事慶通女達實特穆爾雖主其婚然
亦甚厭之乃陰與士誠定計揚言使士誠出兵復建德
諤勒哲不為備遂被圍苗軍悉潰諤勒哲與其弟巴延
皆自殺士誠遂據杭州十九年朝廷因授士信江浙行
省平章政事士信乃大發浙西諸郡民築杭城于是方
面之權悉歸張氏達實特穆爾存虛名而已俄而士誠

欲求王爵達實特穆爾謂左右曰我若逆其意目前必
受害當忍耻含垢以從之乃具聞于朝不報士誠遂自
立為吳王即平江治宮闕立官屬時達蘭特穆爾為江
浙行省右丞哲伯為左右司郎中二人諂事士誠數媒
孽達實特穆爾之短二十四年士信乃使王晟等面數
達實特穆爾過失勒其移咨省院自陳老病願退又言
丞相之任非士信不可士信即逼取所掌符印而自為
江浙行省左丞相達實特穆爾徙至嘉興峻其垣墻錮

其門闔防禁甚嚴達實特穆爾日對妻妾飲酒放歌自
若士誠既拘達實特穆爾索行臺印章布哈特穆爾封
其印置諸庫曰我頭可斷印不可與又迫之登舟曰我
可死不可辱也從容沐浴更衣與妻子訣賦詩二章乃
仰樂死後數日達實特穆爾聞之歎曰大夫且死吾不
死何為命左右以藥酒進飲之而死士誠乃使載其柩
及妻孥北返于京師

欽定續通志卷四百九十八